

陶雲汀先生奏疏

奏疏卷三十五目錄

江督稿

安化陶

淮鹽綱食各岸地暨煎捆各場所同

法籌濟摺子

請將商領行運綱鹽酌量緩納課銀摺片

確查馬棚灣迤南等處漫口情形摺子

馬棚灣漫擊情形暨從嚴叅辦緣由摺片

臬匪糾夥護私抽費審明定擬摺子

請鼓勵出力員弁摺片

籌備賑需請留藩道關庫銀兩摺子

旗綠各營因災借支米折銀兩摺子

縷陳江蘇辦災章程摺子

附代遞學政謝

恩摺片

現在鹽務災務竝掣獲匪犯辦理各情形摺片  
覆奏查明職員條陳淮商積弊審擬摺子

淮鹽綱食各岸地暨煎捆各場所同

法籌濟摺子

奏爲淮鹽綱食各岸地暨煎鹽捆鹽各場所同時  
被水運務竭蹶現在設法籌濟各情形仰祈

聖鑒事竊照淮南鹽務於本年三月開辦辛卯綱以

來其時尚多已丑已請未運之鹽兼以糧私積

壓各岸滯銷新鹽未能發運經

臣與湖督臣等

設法疏銷四五月間將有起色商情亦已知踴

躍趨公突於六月內大江水發江寧揚州等府

沿江兩岸行鹽各地多被水淹併據江西鹽道

稟報存貯積鹽四萬餘引被水衝淹過半搶救不及現在亟須接濟又據湖北鹽道稟稱大雨兼旬江汛異漲口岸盡被漫淹銷數復行壅滯復接督臣盧坤來信以江湖漢沔同時竝漲潰溢甚多漢鎮買鹽街市俱在水中湖南長岳常澧各屬據報情形相同引鹽陡遭水厄銷數日少等語其餘安徽省沿江沿淮各州縣向食淮鹽之處莫不被淹卽淮北引鹽所行豫省光固等口岸亦多被水之處其儀徵捆鹽洲地早經淹沒一望瀰漫屯船由泰壩載鹽至揚經過壩

河又因洪湖洩水歸江勢難橫截牽挽而上卽  
儀所已掣之鹽亦因江路渺茫停泊難行臣睹  
悉情形莫名焦灼當飭運司委員另覓捆場設  
法趨挽展轉尋覓始得劉和尚巷乾地一片築  
爲捆場將已至儀徵之鹽刻期捆運正在集夫  
興辦適報洪湖迭漲運河馬棚灣等處漫口西  
水建瓴下河各州縣被淹如興化鹽城東臺阜  
寧泰州等處正淮南煎鹽之所盡歸沉浸一片  
汪洋其海口范公堤外各場又因風潮洶湧致  
被衝淹據通州泰州各司場紛紛稟報被水尙

有因水隔絕文報未通者現飭運司委員分路  
勘辦至煎鹽場竈既在水中尤關緊要其存貯  
在垣之鹽僅恃加築垣圩難資保護臣於前過  
揚州時面飭運司傳諭各商速卽運鹽出場或  
就高阜暫貯或卽多雇船隻裝運出壩不必拘  
定交課重鹽之例觀望遲延致令鹽被水消盡  
付烏有將來卽有缺鹽之患所傷更多自應稍  
爲變通辦理至於場竈煎丁及運夫捆工等人  
衆實繁值此大災不能不設法救濟現在各處  
重災運庫旣無款以濟地方亦斷無由地方籌

款協濟鹽務之理仰屋躊躇不勝焦急惟查有  
鹽義倉穀一項早經虧缺霉變發商買補尙應  
有穀十餘萬石以二穀一米計算應得米五六  
萬石散布各場及揚城儀徵災務之用尙可稍  
資救濟其被水成災各畝地錢糧容臣另行查  
勘明悉再行具

奏籲請

恩施至各處餉需無款措解只得暫請停緩合併陳  
明所有淮南煎鹽抽鹽及各省銷鹽引地同時  
被水現在設法籌計各情形理合專摺具



奏伏乞

皇上聖鑒謹

奏

道光十一年七月十五日具

奏八月初十日奉到

硃批另有旨欽此同日奉到道光十一年七月二十  
六日內閣奉

上諭陶澍奏場所被水設法籌濟一摺准鹽綱食各  
岸地暨煎鹽捆鹽各場所同時被水場竈煎丁及  
運夫捆工等人衆繁多值此大災自應設法救濟

據該督查有鹽義倉穀一項早經虧缺霉變發商  
買補尙應有穀十餘萬石以二穀一米計算應得  
米五六萬石着准其散布各場及揚城儀徵災務  
之用以資救濟其被水成災各畝地錢糧著查勘  
明確具奏辦理欽此

請將商領行運綱鹽酌量緩納課銀摺片

再淮南鹽務此次被災不但場竈被淹卽捆鹽洲地與銷鹽各省無不皆然實爲從來未見未聞之事商情惶縮銷運兩難各岸旣少回課外來銀路亦窒轉輸力實難支查現在一切待解緊餉如奉撥辛卯年江寧兵餉甘肅兵餉新疆經費以及額解南河餉銀節省河餉等款暨應解部府上半年利息等銀統計有百餘萬兩之多除於新收錢糧內撥解過江寧兵餉十五萬兩甘肅餉銀十五萬兩又

奏明籌發淮北運務銀七萬兩此外未解之餉及  
淮北未領之銀尚有八十餘萬兩俱因庫貯已  
空無可籌措該商等仰沐

皇上寬緩欠項裁減浮費復嚴緝梟販杜絕糧私正  
期日有起色不意遭此水患轉益稽遲不勝悚  
急惟新綱已屆半年一切解支需項甚多若俟  
深秋水退回課轉輸實虞延悞且恐新鹽開運  
過遲岸食不繼尤須早爲籌備查得乾隆五十  
二年及五十八等年均因趕運綱鹽商力短絀  
詳准在揚緩納錢糧一兩及二兩不等緩納之

銀俟鹽船到岸卽於賣價扣繳交課船帶揚竝  
無短欠不過納課稍分先後解支稍遲而商力  
得紓餉食可資兼濟當此時勢維艱若不卽予  
變通勢必有傷全局連日熟思惟有將各商已  
請現運之辛卯綱鹽十六萬餘引照依科則全  
數交納外此後請運楚西引鹽卽予每引暫緩  
課銀一兩七錢俟到岸售鹽補納其餘仍按則  
繳納以應撥解緊款之需仍酌與限制楚岸綱  
鹽以趕運三十萬引爲率江西綱鹽以趕運十  
萬引爲率均於每引暫緩課銀一兩七錢俟限

滿停止其所緩之銀循照成案隨船給發文批  
註明商名引數船名賣店編列字號知照楚西  
鹽道立限扣收移會運司衙門查考歸還科則  
全數如此酌籌辦理是應一時之急於餉需岸  
食亦兩有所濟據陞署鹽運司俞德淵議詳請  
奏前來臣查現在水勢浩瀚辦災孔急籌款更難  
公私俱迫不得不權宜調濟於商領行運綱鹽  
每引酌量緩納課銀一兩七錢俟到岸銷鹽補  
行交足俾商力稍紓現課獲速以應要需仍以  
三個月爲限自七月十三日卯期爲始至十月

十三日止過此不准緩納以示限制現在各處  
皆水深恐場鹽全淹岸食乏缺未敢稍事拘泥  
一面飭司諭商照辦俾得趕緊運鹽出場以免  
遲悞謹據實附片縷陳伏乞

聖鑒謹

奏

道光十一年七月十五日具

奏八月初十日奉到

硃批另有旨欽此同日奉到道光十一年七月二十  
六日內閣奉

上諭陶澍奏請將商領行運綱鹽酌量緩納課銀等語著戶部速議具奏欽此

道光十一年八月初九日准

戶部議

奏臣等查兩淮行銷額引例係先課後鹽各商於領引時即將正雜課項按引全數交足始准領引赴岸銷售與各省先鹽後課者情形本自不同今據該督以場窳被淹轉輸不繼請援照成案於楚西綱鹽趕運四十萬引每引暫緩課銀一兩七錢俟到岸銷鹽補交足數以應撥解緊



餉之用係爲籌濟餉需岸食起見應如所請自  
七月十三日爲始至十月十三日止定以三個  
月限期照減緩之數交納仍俟商船到岸銷售  
卽將緩納之銀於賣價內立時扣繳不准絲毫  
拖欠以重科則經此番權宜辦理各商自應輸  
將踴躍轉運裕如以現在請運四十萬引按緩  
納課銀核算每引先交銀二兩四錢零計應徵  
銀不下一百萬兩應令該督卽將此項銀兩按  
限徵足遵照新定章程作爲正項貯庫隨時報  
部轉候要需撥用不得以外支雜款開銷致使

徵完課銀有名無實惟現在辛卯開綱已閱半年之久據該督奏報各商運過引數僅止十六萬餘道加以現定緩納引數四十萬道亦不過五十餘萬道核計全綱引數不及三分之一轉瞬卽交冬令尤應亟籌釐運俾不致有碍下年綱引所有下餘辛卯綱引一百十三萬餘道應令該督卽飭趕運趕銷如緩納引課未滿三月之限業已如數交齊卽將未運之引接續催徵不得藉辭積壓預爲地步以符年額至該督援引乾隆五十二年及五十八年緩納課銀之案

據稱係詳准辦理臣部無從稽查應飭錄原案  
送部以憑考核等因奉

旨依議欽此

確查馬棚灣迤南等處漫口情形摺子

奏爲遵

旨確查馬棚灣迤南等處漫口情形據實

奏參仍請將該管各員弁分別革職議處畱工效力併自請議處以重隄防仰祈

聖鑒事竊臣由清江浦回省於七月十六日在運河

舟次承准軍機大臣字寄道光十一年七月初

九日欽奉

上諭陶澍奏覆勘馬棚灣等處漫口請將道將廳營分別革職議處併自請交部議處一摺此次該處

漫口失事據該督奏稱署高郵州光謙稟以爲揚  
河廳不豫備料物不認真搶險所致署揚河廳張  
心淵則以爲高郵州偏護民田不肯認真彈壓及  
時拆壩之故該員等推諉卸過各執一詞究竟因  
何失事其咎自有攸歸朕辦理庶政務在核實斷  
不能因事已如此稍從含混且嗣後更無徼倖也  
著該督確切查明據實叅奏其揚河營守備王拱  
壽據奏請革職畱工効力永安汛千總李明嵐據  
奏係專汛之弁應卽革職亦著再行查明俟奏到  
時一併再降諭旨至失察護淮揚道王貽象河營

叅將張兆前經張井片奏寬免開叅會降旨俟事竣後再降諭旨惟張井片奏內尙有遊擊薛朝英何以該督此次所奏僅止二員與張井先後不符併著查明具奏該督自請交部議處之處俟事竣後再降諭旨將此諭令知之等因欽此仰見

聖主權衡至當事歸核實之至意伏查本年湖河水勢自五六月來迭見增長臣與河臣因下河田

禾正茂力主堅守各壩以待成熟六月十六日接據署高郵州光謙稟稱水勢逐日增長東堤間有卑矮殘缺之處已准揚河廳營趕下土婦

加高幫寬以資保護若天日久晴無西風驟至則四壩竟保不開仰賴無旣等情其時道將廳營已報水勢洶湧稟請開壩當飭迅速妥辦十八日該署州光謙復同署揚河廳張心淵及揚河營守備王拱壽會稟河水長至一丈六尺較上年盛漲大四尺永安等汛堤高出水者三四尺低者數寸至一二尺不等西岸堤工掣通僅恃一綫東堤爲下河七州縣保障各汛舊埽入水甚多其無埽長堤卑矮之處分別用柴用草搶廂護埽草工用土築做子堰無如水勢日增

險工疊出設遇西北風作溜浪直湧東堤萬分  
危急擬將四壩次第起放以固堤工而資減洩  
等語卽經臣飛飭趕緊次第啟壩去後不期水  
來太驟風雨交加業已無及接據該廳營稟報  
十八日馬棚灣迤南及十四堡南同日漫塌成  
口併據署高郵州稟是日西北風暴驟雨如注  
揚河廳營前往馬棚灣等處防險該署州親往  
萬佛菴等處取土防護於戌刻接信知馬棚灣  
等處已被水漫溢掣塌雖經廳營搶護人力難  
施等語查六月十八日風浪驟起各處搶險揚



糧揚河兩廳俱極危急人衆惶駭揚河之馬棚灣等處西堤久塌湖河尤險是其失事由於風狂浪濤所致本無疑義該廳地盡高寶途長二百餘里險工林立該員弁等奔馳護救顧此失彼誠亦難免至於搶護加埽築做子堰併請開四壩皆三人會稟辦理初無舛錯迨十九日復據揚河廳營稟稱昨與署州光謙商議擬不候前稟批示卽啟四壩適奉六百里來札正欲次第啟放而該署州以衆民阻求擬先啟一壩旋有本地及下游農民數千人喊至大堂曉諭不

止似此兆庶阻撓必須該州彈壓特恐東堤普  
律瀾漫城池難保等語言外欲以東堤漫塌委  
諸該署州彈壓開壩之不速而光謙亦卽於二  
十二日具稟十八日漫口時張心淵趕至州署  
商酌如何辦理擬啟四壩以分水勢比卽發示  
鳴鑼曉諭壩下居民遷移高阜隨有農民數百  
喊至卑署口稱馬棚灣堤工張倅不早備料加  
築水漫之時又不備料搶險以致竟被掣通今  
若再開南首各壩不但田廬被淹城池亦難保  
守必得馬棚灣缺口修起方可啟開等語意欲

以道路阻守之言與張心淵互相抵制事後違  
言彼此均非事實臣查河堤之有閘壩原以藉  
資蓄洩一遇水患則壩上之民惟恐保守之過  
堅詛怨時形壩下之民又虞啟放之太早拚命  
阻撓往往歸咎於官而地方官與河員又復互  
相推諉實爲惡習必應整飭是以從嚴叅辦與  
疎防各員一併請

旨分別革職交議併批飭該道嚴查稟覆業已自知  
愧悔竝無各執茲奉

諭飭確切查明前情無異其失事之故委因風水浸

溢掣卸人力難施所致尙非盡該員等之咎惟疎防失察例有處分現當整頓河務必須從嚴叅處署揚河廳通判清河縣知縣張心淵揚河營守備王拱壽係該廳營本管仍應請

旨革職畱工効力前署高郵州知州候補知縣光謙有協防之責應請交部照例議處永安汛千總李明嵐係專汛之弁責任尤重不堪策勵應卽革職護淮揚道外南同知王貽象河營叅將張兆河營遊擊薛朝英在洪湖堰堤搶險分身不及究屬失察應請照例議處

臣

前次繕摺時將

薛朝英漏未請叅實屬疎忽運河漫口未能先  
事預防併應請

旨將 臣 議處以重堤防所有 臣 遵

旨飭查馬棚灣等處失事情形謹確切查明據實恭  
摺覆

奏伏乞

皇上聖鑒訓示謹

奏

道光十一年七月十七日具

奏八月十七日奉到

硃批另有旨欽此同日奉

上諭陶澍奏查明馬棚灣迤南等處漫口情形請將該管各員弁分別革職議處畱工効力併自請議處一摺前因馬棚灣等處漫口據該督奏稱署高郵州與署揚河廳推諉卸過各執一詞當經降旨令確切查明究竟因何失事咎有攸歸著據實叅奏茲據奏失事之由實因風水漫溢掣卸人力難施尙非盡該員等之咎惟疎防失察例有處分自應嚴懲示儆署揚河廳通判清河縣知縣張心淵著河營守備王拱壽均著革職畱工効力前署高

鄆州知州候補知縣光謙著交部照例議處永安  
汛千總李明嵐著卽革職護淮揚道外南同知王  
貽象河營叅將張兆河營遊擊薛朝英均著照例  
議處該督前次奏摺內未將薛朝英開叅究屬疎  
忽併運河漫口未能先事豫防之處著一併交部  
議處欽此

馬棚灣漫掣情形暨從嚴叅辦緣由摺片

再此次馬棚灣等處漫掣情形經臣確切查明

實因水勢浩瀚風狂浪湧人力難施所致該廳營等奔走搶護不但加上加料確有稟據併經

河臣派委薛朝英前往漫口鑲做裹頭查得馬

棚灣尙有存料一碼約計五千餘束其並非張心淵不備料物搶救不力可知至四壩水誌已

逾啟放定限不但道將廳營屢請開放卽光謙亦經會稟有案祇因水來太驟接到批開時該境業已漫口本年各處漲發卽江邊大堤重圩



百姓併力苦守亦漫潰以數百計况運河一綫

長堤堵截全淮盛漲風雨驟至實有搶護難周

之勢馬棚灣地勢較在上游比之昭關等壩齊

開其患尙爲稍緩河臣因堅主守壩該道將驛

營俱經稟放在先不能諉令受過是以請免開

叅原係準情酌律辦理臣初意正復相同迨次

日親詣覆勘見漫口頗寬將來興工尙須衆力

且本年洪湖石堤衝塌甚多卽黃運兩河工程

亦復不少若漫口之處全免處分誠恐後來果

有失事亦復視爲泛常則人心一弛玩愒必生

是以仍執法叅辦係屬從嚴辦理不使鬆勁如  
果將來辦工出力足贖前愆自當據實懇請開  
復俾

恩出自

上責無旁貸此臣叅辦此案與河臣辦理不符之委  
曲也接奉

諭旨謂稍從含混嗣後更無所做揚仰見

聖明洞燭識澈幾先臣不勝佩服欽誦之至所有疎

防各員張心淵署事本猶未久王拱壽亦尙稱  
諳練惟係該廳管本管業已疎防仍請革職留

工以觀後效光謙候批開壩本無不合惟既有  
協防之責亦應照例議處至李明嵐係該汛專  
弁責任尤重臣於路過時併未見面怠懈可知  
不堪効用應卽革職至護理淮揚道王貽象河  
營叅將張兆遊擊薛朝英均因堰堤危險分身  
不及其保護洪湖甚力其失察疎防之咎甚輕  
如蒙

聖主仍許存俟馬棚灣等處工竣以觀後效係出

恩慈非臣所敢分晰至臣未能先事防維尤難辭咎

仍請



梟匪糾夥護私抽費審明定擬摺子

奏爲審明梟匪糾夥護私抽費分別定擬仰祈

聖鑒事竊照儀徵老虎頸地方爲鹽船叢聚之所最

易藏奸經

臣

訪有梟目蔣來山綽號蔣四長子

在彼勾結潛藏護私抽利密委京口右營遊擊  
孫廷揚覓帶眼線前往緝拏旋據該遊擊稟報  
督帶弁委兵丁會同盟務委員拏獲首惡蔣四  
長子夥犯張立等六名併獲私船刀鎗火藥砂  
子等物又據弁委等另稟拏獲倚梟許正玉等  
數十名當經

臣附片

奏明飭發署運司俞德淵督同府縣審辦在案臣

於本年五月內由清江起程回省道經揚州卽就近提集各梟犯訊取大概供情仍發該署司再加確訊去後復據儀徵縣會營掣獲蔣四長子案內夥犯唐可士一名又經批司歸案審辦各在案茲據署兩淮鹽運使俞德淵督同揚州府等審擬詳報前來臣查蔣四長子卽蔣來山唐可士卽唐小士又名唐允祥湯大義俱籍隸湖南零陵縣張立卽蔣立籍隸湖北江夏縣俱未爲匪犯案蔣四長子與在逃之唐五唐學義



明唐三元熊義發鄧三李學山秦老五蔣百輝  
八人引領私鹽賣與過路船上作爲大帶頭唐  
可士等向不識姓名舊貨担上買備刀械火鎗  
等物又糾現獲之湯大義張立及在逃之熊士  
慶唐國章唐雨世曾得才周本尙七人入夥作  
爲小帶頭同夥二十人護私抽費蔣四長子每  
千得錢二百文唐五等四人每千得錢一百五  
十文餘錢湯大義等派分自二月起至四月止  
因營縣查拏嚴密僅獲私販七八次得錢無多  
不計確數作爲飯食用去旋即訪拏被獲併在



船內搜獲禁刀火鎗等物確訊該犯等各供認前情不諱案無遁飾查此案蔣四長子等於迭次獲梟懲創之後輒敢糾集匪徒置備軍火器械架私抽費稱爲總副老大及大小帶頭名目實屬愍不畏法蔣四長子起意設立馬頭係鹽梟巨魁應請照例辦胡大成黃三等成案擬發新疆給種地兵丁爲奴現在新疆已奉停發應遵調劑章程改發雲貴兩廣極邊烟瘴充軍酌加枷號三個月定地發配唐可士等聽從護私分利作爲大小帶頭亦係同惡相濟現當整頓

離務未便僅照爲從擬徒應請加等問擬唐可  
士湯大義張立均應於爲從滿徒上酌加一等  
各杖一百流二千里到配折責安置湯大義一  
犯現已病故應毋庸議蔣四長子唐可士張立  
各供親老丁單俱係護私梟匪情節較重不准  
查辦鄧三才訊未同夥分錢第爲巨梟服役亦  
非善類請照不應重律杖八十折責遞籍管束  
蔣小六係濫划船度日劉金元係在划船打雜  
撒正卽邵撒正係在鹽船打雜俱非蔣四長子  
等同夥但係外省之人聚集老虎頸私販出沒

之所未便容畱均請遞籍管束蔣四長子所得  
護私錢文竝無確數應免著追刀鎗火藥等件  
案結解營配用逸犯唐五等緝獲另結該犯等  
鎗刀業已竝獲究辦失察職名請免開送除錄  
供招咨部竝將另獲各案梟犯顧鳳禮許正玉  
等分案辦理外合將掣獲梟犯飭審定擬緣由  
恭摺具

奏伏乞

皇上聖鑒勅部核覆施行謹

奏

道光十一年七月十七日具

奏八月十七日奉到

硃批刑部議奏欽此

部議覆准



比遊擊孫廷揚會同署京口副將李恩元乘夜往挈京口千總鄭長清首先跳上匪船破艙而入蔣四長子入水奔逃額外外委劉長清亦卽一躍入水與鄭長清在於水內將犯揪住候補千總李鎮元亦赴水同揪各弁委上前一齊擒獲併獲夥犯六名其候補副將三等子陳述祖以揚營署事之員於匝月之中連獲巨梟三十餘名督率洵屬認真又鹽務委員候補運判趙祖玉在焦山鬪山江面緝私不避艱險來往巡探此次獲犯數起卽係該員一同挈獲各該員

弁俱屬出力除副將李恩元現以堪勝總兵保  
送引

見孫廷揚業經

奏准畱於江南以外海參將陞用毋庸另行甄敘  
千總鄭長清緝捕夙勤應請卽以守備儘先陞  
補額外外委劉長清緝捕勇往遇有沿江把總  
缺出卽行陞補現當糧船南下之時搜緝糧私  
最關緊要所有候補副將三等子陳述祖候補  
運判趙祖玉候補千總李鎮元卽飭令彈壓糧  
船嚴密搜查如果搜緝得力再行

奏請儘先補用其餘在事出力各弁兵由 臣 分別  
獎賞記名拔補謹遵

旨核實查明出力員弁附片

奏請鼓勵伏候

聖裁謹

奏

道光十一年七月十七日具

奏八月十七日奉到

硃批另有旨欽此同日奏到八月初二日內閣奉

上諭陶澍奏營弁拏獲梟匪懇請鼓勵等語江南京



口千總鄭長清著以守備儘先陞用額外外委劉  
長清遇有沿江把總缺出卽行陞補該部知道欽  
此



恩施撫卹在案現在雖晴霽日久而江湖諸水未見  
消退被淹田畝難期涸出秋成有礙將來蠲緩  
賑卹均所不免自應先籌庫貯以備急需先經  
飭司查明堪動銀數併分別咨行道庫運庫關  
庫一併查報除海關無項可撥竝龍江許墅揚  
州各關備撥銀兩應存畱河工備用外又兩淮  
運庫因儀徵捆鹽處所已被淹沒各場多在水  
中無處煎鹽不能趕運又江寧藩庫因所屬州  
縣連年災歉錢糧多有蠲緩所貯銀兩僅堪支  
應兵餉及年額一切經費之用現又撥放撫卹

竝分赴鄰省採買米石均屬無項可撥惟查得蘇藩庫秋撥封貯等款除動撥丹徒丹陽二縣撫卹竝蘇常等屬情形尙在未定應酌畱銀四十萬兩備用外查有正項銀七十二萬餘兩又未經起解之捐監銀一十萬兩又放剩緩漕米價銀五萬餘兩應請全數扣留備用又江糧道庫堪撥銀十四萬餘兩蘇糧道庫堪撥銀二萬餘兩均請一併暫畱備用覈計尙多不敷相應奏懇

聖恩俯准於浙江藩庫關庫內將堪以動撥銀兩暫

行扣畱容俟將來籌定實用銀數再行請

旨遵行除咨明戶部外合詞恭摺具

奏伏乞

皇上聖鑒訓示謹

奏

道光十一年七月二十日會

奏八月初十日奉到

硃批戶部速議具奏欽此

戶部議

奏臣等伏查江蘇省江寧等屬本年被災較廣業

經該督等奏蒙

恩旨允准先行撫卹在案今據該督等奏稱現雖晴  
霽日久積潦未消秋成有礙將來蠲緩賑卹均  
所不免應先籌庫貯以備急需請將蘇藩庫秋  
撥封貯等款除動撥丹徒丹陽二縣撫卹並蘇  
常等屬情形尙在未定應酌留銀四十萬兩備  
用外查有正項銀七十二萬餘兩又未經起解  
捐監銀一十萬兩放剩漕價銀五萬餘兩全數  
扣留又江糧道庫銀十四萬餘兩蘇糧道庫銀  
二萬餘兩一併暫留備用等語查該督等奏請

暫留蘇州省藩道各庫銀兩係爲籌備撫卹災  
民要需自應俯如所請准其將蘇省藩道各庫  
銀兩暫行扣留以備賑濟至奏稱此外尙多不  
敷請將浙江藩關各庫堪以動撥銀兩暫行扣  
留俟將來籌定實用銀數再行請

旨遵行臣部查此次籌備賑需已有一百四十餘萬  
兩之多原可陸續支發卽稍有不敷自應查明  
實用銀數再請籌款何得先將浙省藩關各庫  
銀兩全數扣留且查浙省撥冊此時尙未造報  
到部其堪以動撥銀數亦難以懸擬若如該督

等所奏請將全數扣留礙難准行應令該督等  
俟辦有成緒如果不敷另行請

旨籌款撥用足可接濟仍責成該督撫等董率所屬  
實心經理俾災黎均沾實惠併隨時嚴密稽查  
倘官吏等有侵尅冒濫情弊立即嚴叅究辦毋  
許稍有徇隱等因奉

旨依議欽此



旗緣各營因災借支米折銀兩摺子

奏爲旗緣各營因災援案借支米折銀兩分月扣還以恤兵艱仰祈

聖鑒事竊據江寧藩司陸言詳稱江寧八旗官兵月支口糧定例本折兼支因駐防年久生齒日繁月支銀米不甚裕如道光三四等年偶值災歉曾經借給兩月米折銀兩奏蒙

恩准照數借給分別扣還在案本年入夏以來大雨如注江潮湧灌廬舍坍塌食物昂貴官兵生計拮据據請借支兩月米折銀八千二百六十九

兩九錢二分四釐數與借支成案相符應請在  
於司庫地丁款內如數借給以資接濟所借銀  
兩卽於官兵應支來年正月米折起分作十箇  
月縮扣歸還以清款項又據溧陽營因米薪昂  
貴兵丁所領糧餉不敷度日懇請每名借支米  
價銀二兩共銀五百九十六兩亦請於來年分  
作十箇月扣還歸款應於司庫地丁銀內一併  
借給以示體卹等情詳請覈

奏前來臣查前據督協狼鎮各標營以本年夏雨  
成災米價驟昂兵丁口食維艱請借餉銀接濟

卽經會摺

奏准在案茲江寧八旗及溧陽營兵丁亦因米糧  
昂貴援案請借米折價銀俾資生計係屬實在  
情形合無仰懇

聖恩俯准照案借給俾該兵丁得此借款不致口食  
無資仍於來年應得米折月餉內分扣還款庫  
項亦不致久懸叨沐

皇仁實無旣極謹會同江蘇巡撫臣程祖洛合詞恭  
摺具

奏伏乞

陸軍大臣奏請卷三  
三  
皇上聖鑒謹

奏

道光十一年八月初七日具

奏九月初六日奉到

硃批另有旨欽此同日奉到道光十一年八月二十

三日內閣奉

上諭陶澍奏請借支各營米折銀兩一摺江南江寧  
八旗及溧陽營因本年夏雨成災米糧昂貴官兵  
生計拮据據該督查查明援照成案借支餉銀著照  
所請准其在於司庫地丁款內借給江寧八旗官

兵兩月米折銀八千二百六十九兩零卽於官兵  
應支來年正月米折起分作十箇月扣還歸款借  
給溧陽營兵丁每名米價銀二兩其銀五百九十  
六兩亦於來年分作十箇月扣還歸款以示體卹  
該部知道欽此

縷陳江蘇辦災章程摺子

蘇撫會稿

奏爲縷陳江蘇現辦災務情形以廣

皇仁仰祈

聖鑒事竊照本年夏秋間江淮湖河同時並漲各屬  
多被水災迭奉

諭旨賞給撫卹碾穀平糶並

恩允借動庫項採買米麥免稅通商接濟民食

軫念災區無微不至伏查臣等前次報災摺內欽奉

硃批有云悽慘景况不堪設想百姓何辜總由朕之  
不德所致欽此又於趕緊易換錢米隨查隨給句

旁欽奉

硃批所辦甚是務要趕緊拯救均沾實惠或可免委  
於溝壑也等因欽此臣等跪聆之下感凜交增比  
卽恭錄欽遵轉行知照宣播

皇仁聞者莫不感泣旬月以來人心帖定雖災不擾  
良者安命而莠者畏法斯皆

聖德之所彌布有以淪肌而浹髓也惟是本年災重  
且廣顆粒乏收哀鴻遍野博濟實難現在各處  
水勢雖已落至四五六尺不等尙未全行消退  
撫卹散畢之後須將災分勘定俟百姓田廬涸

復始能查明戶口散給大賑自秋徂冬爲日尙長自應設法接濟臣等體察情形於例賑之外酌擬章程十二條率屬籌辦仰答

宸厯謹陳於後

一倡率勸捐以矜貧乏也查任卹之誼從古所重而勸分一節尤於荒政爲要本年水災旣重臣等前已出示曉諭勸捐竝卽率同司道府州等查照道光六年成案各捐廉費爲倡現據江寧省城紳耆士商暨僑寓有力之家湊捐銀十餘萬兩鎮江府城聞亦捐至十萬



以外其餘各屬據報或捐銀或捐錢或捐施  
饑餅米穀或捐銀買米平糶至金盡爲止雖  
確數尙未彙齊大率皆能踴躍至鄉村僻遠  
之區勢難周徧卽以各村所捐之貲贍其本  
村其貧村不敷捐辦者以鄰近富村酌爲協  
濟每處公舉三兩人經理董管其捐項仍存  
於捐者之家官吏皆不經手卽鄉董亦第記  
其捐數與得錢人數爲之調撥使其自相授  
受施者見德受者感情庶安貧卽以保富而  
人心自帖矣

一資送流民以免羈畱也查水勢初來汪洋一片災民無可托足難免逃荒外出其中良莠不一如聚集太衆恐致滋生事端現飭隨處稽查予以資送先詢明本籍村庄令其回籍待賑如本籍無可棲止或別處有親故可依及年力壯強願往各處傭趁者現飭地方官酌給錢文派差押送下站收取回照下站亦照上站遞送總令隨到隨行分散其勢不使停畱滋事俟田廬涸出仍資送回籍復業

一收養老病以免流徙也資送之法旣行強壯

者自可分遣其中老弱殘疾出既無力歸又無家尤堪憐惻亦須分別畱養卽以地方之大小酌量人數之多寡擇城外寬廠寺院與之棲止按日發給口糧不准進城滋擾其有男女同行者詢明實係一家准其同住餘悉別居不許混雜仍派員彈壓造冊稽查以憑水退時回籍領賑

一勸收幼孩以免遺棄也貧民被災外出口食無資致將幼孩遺棄道旁歷經勸諭富民收養而有力之家多不敢收蓋恐日後仍被本

生父母認還撫養徒勞兼虞詐擾夫襁褓待人爲活父母旣不能養而棄之其情已絕收而養之者卽其父母也撫成之日或作子女或作養媳悉聽其便本生父母日後應不承認還其有好義之家收養棄兒仍情願送還本生父母者地方官倍予嘉獎務俾幼孩多得生路

一勸諭業戶以養佃農也查業戶田產給佃承租佃戶亦藉資食力比之平人較爲親切此時業戶雖亦遭災究屬有力居多現飭勸諭

富厚業尸酌借窮佃錢米以度荒歉俟至豐歲償還但不得倚災強借如有凌犯仍按例嚴行懲治其力量無多難以分潤者亦不必強如有能收養多人或所貸數多而不責償者由地方官酌予獎勵使業佃以恩義相結亦可感召祥和

一 殮瘞屍棺以免暴露也查驟漲之下水勢衝急多有棺柩被水漂流且有淹斃屍骸隨流漂滿者現飭沿江各縣及救生等局雇夫撈殮厝其棺柩俟水退有人認實給還如係無

上屍棺卽買地厝葬作爲義塚其有好善之人情願捐辦者按其殮瘞多寡分別獎勵

一多設糶廠以平市價也現值市糧昂貴之時除碾動常平倉穀照例減價平糶外前經

奏明籌項委員分赴鄰省陸續採買米麥已於河南省買得麥三萬石米一萬五千石現飭分撥災重各州縣設廠平糶查明實係貧戶酌定升斗給票准買以杜市僧影射漁利仍俟採買事竣覈數歸款竝分勸積穀之家隨力平糶各濟本村出糶之戶旣多則市價可

期日減矣

一變通煮賑以資熟食也查從來救荒每多煮粥然粥廠需費較重今擬兼用糊麩以濟不足一廠之中多設鍋竈天明舉火燒水令沸先將白麩調以涼水俟湯沸入麩於鍋隨入隨澆卽已調熟隨煮隨給不稍停畱此鍋甫罄而被鍋又熟矣事省費輕亦以備隆冬煮賑之一法

一捐給絮襖以禦冬寒也災民衣褐不完冬月尤爲難度欲給棉衣自須有面有裡工料不

能甚省恐人多而費不敷且窮民得之易於  
當賣查有一種棉花彈成絮襖兩面用線經  
網不費布疋亦可禦冬其價既廉鬻之無利  
今擬隨捐項之多寡酌量製辦於散賑時見  
有老病極寒者加給一件亦可免於受凍至  
典舖本有年冬讓利之條擬卽飭諭典商凡  
在今冬贖取棉襖布衣者讓利一半似於損  
富有限而濟貧實多

一勸施子種以備種植也查樹藝皆足養人是  
以穀不熟曰饑菜不熟曰饑凡卉蔬可食之



物種類何止千百惟生植必視土所宜如瓢  
菜產自江寧而蘇揚卽少油菜蔓於沙地而  
山區卽瘠小民謀生路熟隨宜佈種一俟水  
勢稍落凡可種之地與可食之物皆不待勸  
而能但恐災民倉猝轉徙所存子種無多此  
時貴木旣竭購備維艱應卽通飭勸諭有能  
施給子種者或穀或菜其功同於錢米均可  
廣佈以蕃種植而資速濟

一禁止燒鍋以裕穀食也查耗穀之具莫如麪  
箕祇以小民賣酒營趁亦是謀生一端而江

省水陸交衝貿遷來往一經出示禁酒徒爲  
胥役訛詐之資勢難全禁惟此時災歉已甚  
粒食維艱豈容更滋暴殄除酒自外省載來  
仍許買賣流通及秫糯無多准釀外其本地  
燒鍋做坊傷損食穀最多實爲荒年之害所  
有稷稻一項應行禁止熬燒以裕饑餐

一收牧牛隻以備春耕也貧民遇災口食尙且  
難顧雖有耕牛無力喂養往往鬻於私宰之  
人得錢過度目前旣嗟殄物日後又嘆輟耕  
深堪憫惜今擬於捐項中酌提經費設局收

國史館編年三十三  
三十三  
養凡貧民以耕牛赴質者量給當錢暫爲收  
養仍給以當票竝錙下角尖俾其收執以俟  
贖時比對此係道光三年蘇省行之有效者  
現在亦擬照辦庶愛物卽所以仁民矣

以上十二條經臣等與藩司林則徐梁章鉅巡  
道葆謙等籌商覈定飭屬舉行竝將章程抄發  
照辦間有情形不同之處亦聽其參酌而行冀  
無窒礙刻下各屬均在勸捐果能多多益善則  
經費得以有資全活自必不少將來事竣容  
等數明捐數分別

奏請獎勵仍隨時督率妥辦總期人皆得濟費不  
虛糜以仰副

聖主懷保惠鮮之至意所有臣等籌辦災務情形謹  
縷晰具

奏伏乞

皇上聖鑒謹

奏

道光十一年八月二十六日具

奏九月二十二日奉到

硃批所奏十二條大旨俱已詳備覽奏朕心稍慰務

須實力實心詳慎擇人辦理被災百姓苟能免溝  
壑之患汝等可謂盡心盡職亦稍贖朕之闕失矣  
勉益加勉欽此

附代遞學政謝

恩摺片

再臣接准江南副考官新授江西學政鄭瑞玉交到謝

恩摺一件以現值主試江南隨帶人等關防均應嚴密未敢自行專人賫摺進京移咨交臣代遞等情理合附片聲明據情具

奏伏乞

聖鑒謹

奏

道光十一年八月二十六日具

奏九月二十二日奉到

味批覽欽此

現在鹽務災務竝掣獲匪犯辦理各情形摺片  
再兩淮鹽務自新章旣立刪除積弊鹽價稍減  
銷路漸通祇因五六月內各口岸雨水爲災售  
數有滯自入秋初菜市正旺現查七月內漢岸  
銷數惟十三日風雨未經售鹽其餘每日銷子  
鹽四五萬包至七八萬包竝有銷至十一二萬  
包者統計自正月十一日起截至七月二十九  
日共銷鹽一千六百五十六萬七千餘包計引  
三十五萬五千九百有奇銷數之廣爲頻年所  
未有惟所銷皆係往年已經納課遲滯之積鹽



此時尙剩二十五萬餘引計冬間方能銷訖從此截清界限銷行辛卯綱新鹽堅守章程不令擾混再將糧私一靖鹽務可望起色現在湖北查辦腳私極爲認真儀徵爲捆鹽之所尤須嚴查夾帶經臣迭飭實發水腳毋使船戶藉口帶私其沿河訛詐黑費之匪徒前後訪獲不下百餘均經懲儆業已肅然惟有窮民艚船一項裝載私鹽積少成多數百成羣查有匪棍藉災爲名僱覓老幼男婦裝點偷越當此災年正應舍禁去幾之時旣不便索及災民而梟棍匪徒斷

不容其潤合自應設法分別辦理復經臣派委員弁帶領兵役在於揚關駐查如係老弱災黎帶鹽無幾准予給價收買以資矜卹其鹽卽交垣捆運免致混入腳私如係匪徒僱覓裝載立刻擒拏現亦均知斂跡至回僑多係鳳壽等處獷悍之徒帶刀逞兇爲害地方不止於販私必應驅除臣前於七月內路過三汊河等處聞有回僑與船船搶奪及拒捕之事卽經札飭各營縣無分畛域四面兜拏旋據會稟拏獲匪犯丁雲霞等十六名又據奇兵營稟獲僑匪耿金連

等十五名瓜洲營先後掣獲匪犯朱雲青蔡六等六名王義魁等九名揚州營先後掣獲匪犯耿金剛李信春等十一名張正祥等十五名又續獲唐盛林等十二名李如魁等六名又據京口營先後獲匪王裕堂等及倭匪劉金亮等六名又督同高資營追獲徐貴等十名又獲魯士連等三名梁太等四名又據三江營守備稟截獲許正鳳張湧等四名並獲于金堂周占元等十八名以上各犯均係各營縣協獲竝起有鎗劔撲刀等物及鹽餉船隻經臣飭發運司督同

府縣研訊分別懲辦至地方無賴棍徒藉災滋事尤爲可惡前經秦州掣獲倚衆訛索之王玉林等又桐城縣掣獲過糶傷官之程瀛等均經臣送飭從嚴究懲總使有犯必懲刁風自息於災區可期救輯謹附片縷陳仰慰

宸廑謹

奏

道光十一年八月二十六日具

奏九月二十二日奉到

硃批覽奏深慰朕懷着此光景今歲江南雖罹水患

陸雲汀先生集卷之三十三  
一  
來年以後自必漸復舊規裕國而安民通商而除  
害汝爲幹國良臣而朕亦獲知人善任之美名實  
有厚望焉一力勉行勿怠欽此

覆奏查明職員條陳淮南商積弊審擬摺子  
奏爲遵

旨查明據實具

奏仰祈

聖鑒事竊臣接准兵部遞到道光十一年四月初一  
日內閣奉

上諭御史裘元俊奏職員條陳淮南商弊端一摺著交  
陶澍將呈內所稱淮南鹽務積弊四條秉公查明  
據實具奏職員胡邦光著兵部解任備質欽此竝  
接到御史裘元俊鈔奏一件職員胡邦光原呈

一紙復先後准戶刑二部咨同前由旋於五月十一日准兵部遞解胡邦光到省臣隨卽提訊據胡邦光供稱安徽績溪人年四十八歲捐納州同職銜先在鹽商鮑有恒家江西口岸鮑恒德旗幫夥道光二年鮑恒德歇業該職員於八年赴京十年冬間

欽差查辦鹽務該職員不知底細因見鹽務疲壞故議章程四條一請革商總管庫二稽查重劬三嚴禁滷耗偷漏四緝私清源培郵竈丁各情呈請前任通政司鮑勳茂代奏後因鮑勳茂罷官

求裘御史轉奏如今只求提到原控人證查辦  
等供臣當查被控之運商黃濬泰等俱在揚趕  
辦湖運正當喫緊之時未便行提來省致滋擾  
累隨札飭運司就近秉公查訊詳覆覈辦去後  
茲據陞署兩淮運司俞德淵飭傳被控之鮑有  
恒黃濬泰到案訊據供稱胡邦光與鮑有恒黃  
濬泰均不認識前經鮑有恒素識之程鶴年薦  
與鮑有恒江西鹽店掛名商夥不久卽去道光  
七年胡邦光復至鮑有恒家託其轉索黃濬泰  
書信薦赴江西岸店幫貿鮑有恒未允胡邦光



卽以例給滿耗指爲夾帶赴前運司鄭祖琛任  
內具控批飭甘泉縣查訊胡邦光旋卽規避致  
未訊結其所陳各款如運庫徵收錢糧均係由  
司覈明當綱應納若干刊刻科則曉諭通河遵  
照完納併不由商定數各商請領引鹽亦係自  
行赴庫納課請領向未交銀代納商人無從管  
庫其出場鹽觔向重五百三十觔有場官及秦  
壩委員層層稽查暑月滿耗例准加帶鹽觔係  
由監掣子鹽各官填明詳司給發隨船印單繳  
呈各鹽道覈對並非私帶難以抵作水腳至場

商置垣收鹽無論竈埧商埧均關成本場商利於多買運商利於速銷表裏相因方資接濟收鹽之桶奉官烙印桶價貴賤亦如市間各物長落隨時惟以草產豐歉出鹽多寡爲憑場商愛郵竈丁如同田佃何忍賤價多收以上各款明係胡邦光因求索薦書未允挾嫌捏控意圖拖累等供由司詳覆前來伏查胡邦光所控淮南各弊端在上年未定章程以前原不能保其必無是以臣前在江蘇巡撫任內卽將總商鮑有

恒

奏明黜革在案所陳各條竝經臣於上年會同

欽差戶部尙書王鼎侍郎寶興徹底查明另立條款  
奏奉

諭旨欽遵在案現經陞署運司俞德淵遵照新章次第辦理當此商力疲乏之際必得寬爲撫卹以紓其困前此歷次京控淮商之案往往質對多虛被控商人拖累在省致稽辦運卽未奉提解之商亦每因此遷延觀望卽如淮南乏商童廣恒具控黃濬泰等一案甫於上年經戶部尙書王鼎侍郎寶興審明

奏結現又砌詞赴京翻控奉

旨交新授都察院左都御史白鎔會同江蘇撫

臣程

祖洛覆審被控商人黃濬泰等俱已提赴蘇備

質尙未釋回商力本已疲極經一番控告卽添

一番剝削於鹺務大局甚覺有礙胡邦光係局

外之人事不干已本不應妄行條奏卽使有所

控訴亦應赴都察院及提督等衙門呈遞乃明

知前任通政使鮑勳茂卽係鮑有恒鹽旗本主

向求代奏意本險詐迨鮑勳茂休致後又明知

御史裴元俊與鮑勳茂係屬姻親復以鮑勳茂

匿稿朦庇等情赴裘元俊私宅呈遞名雖求奏  
實冀其迴護嫻親不敢遽奏以爲設法消弭地  
位其爲有心挾制藉端拖累無疑查嘉慶六年  
前督臣費淳奉

旨交審甘泉縣民婦許吳氏京控總商等侵欺帑項一  
案審係藉端圖詐竝無侵欺當以兩淮鹺業爲  
財賦所出若任乏商不遂所欲誣控牽連商衆  
斷難安業嗣後除現在辦運之散商指有侵欺  
確據列款呈控者卽應准理查辦外若歇業乏  
商仍以查閱賬目追求用項等詞呈訴一概立

案不行竝治以妄控之罪等因嗣於道光三年  
前督臣孫玉庭敬陳磋商案內復聲明舊章禁  
止局外之人控擾鹽務如有竝非現在辦運之  
商在京在外牽砌妄控者均立案不行仍治以  
妄訴之罪等因前後

奏奉

諭旨准行各在案此案胡邦光以鹽店掛名商夥久  
經辭出輒因求索薦書未允挾嫌妄訴列款條  
陳實屬不安本分應查照歷次奏定章程將所  
控各情立案不行仍治以妄訴之罪胡邦光應

革去州同職銜照申訴不實律杖一百折責發  
落遞籍交保管束無許再出滋事竝追取執照  
繳銷鮑有恒等應免提質除分別咨部外所有  
遵

旨查明緣由理合據實具

奏伏乞

皇上聖鑒謹

奏

道光十一年八月二十六日具

奏九月二十二日奉到

硃批另有旨欽此同日奉到道光十一年九月十二

日內閣奉

上諭前因御史裴元俊奏職員胡邦光條陳淮商積弊當降旨交陶澍秉公查訊茲據奏職員胡邦光以鹽店掛名商夥久經辭出輒挾求薦不遂之嫌赴京列款妄訴實屬不安本分胡邦光著革去州同職銜杖一百折責發落卽遞回原籍交地方官嚴加管束毋許出外滋事竝追取執照繳部覈銷

欽此